

**Prologa Álgoálbmotvuoigatvuođaid gelbbolašvuođaguovddáža  
almolaš rahpandilalálašvuođas Guovdageainnus 01.09.2003**

***Rauni Magga Lukkari:***

**Ja dál mii leat geaidasis**

Goariduvvon vuoigatvuođaid  
sámilduvvan moalut  
máilmmi álgoálbmogiid  
váimmudeahkis  
inirdit ja verket  
Bávččas juo noandudan ja  
álbmogiid vuorbin lea gártan

Mii guhká leat hoahkan  
maid dainna nondon dieđuin  
iežamet álbmoga  
hávron vuorbbi birra  
Ii diekkáraš diehtu  
gallet min mánáid  
baicce čuoldá mis eret  
rašis árppuid gollada  
loaktá ja boatku

Ja dál  
mii leat geaidasis  
ártegis nihkui leat lihkkán  
oadjebas hieibma  
álbmogiid njávkkada  
linis jurdagiid askkis  
aiddo čálgan ásahussii  
buresbohtima sávvin  
ávuin vuostávdimin

Álgoálbmogiid  
ja vuoigatvuođaid  
ja gelbbolašvuođaguovddáš  
leago diet riegádan

giedas doallat vuolgaleaddji  
mieđušteaddjin  
mañimuš vuoiñanassii  
dološ muittuid searvá

Vai riegádahttuigo  
álgoálbmotvuoigatvuođaid  
gelbbolašvuođaguovddáš  
jedđejeaddjin  
ealáskahttin ja movttiidahttin  
dálkkodeaddjin ja buorideaddjin  
gievrras guvhlárin  
diehttin ja geaidin

Aiddo dienin fal  
duođašta Birtniid Ove  
ja joatkimis joatká  
guovddáš galgá čohkket  
ovdánahttit, systematiseret  
bajásdoallat, giedahallat  
heivehit ja gaskkustit  
relevanta dokumentašuvnna  
álgoálbmotvuoigatvuođain  
riikka ja riikkaidgaskašas dásis

Ja son joatká  
gelbbolašvuođaguovddáš  
galgá leat fágalaččat  
iehčanas ásahus  
ja ferte maddái doaibmat  
jedđejeaddjin  
ealáskahttin ja movttiidahttin  
dálkkodeaddjin ja buorideaddjin  
gievrras guvhlárin  
diehttin ja geaidin

Ja mii  
sávvat lihku